

Son ar Pillaouer

Ton anavezet.

Va zad en deuz va dimezet
Gant eur flerius pillauer (bis)
E Lokeffret ez eo ganet
E komanant Toulalaer!

Foei, foei, foei, va zammik aotrou,
Gant e stoup hag e billou !

Tri devez goude va eured
En em gav foar Landerne (bis)
Ha va lapous, prim dihunet
A zao meaz euz e wele.

Foei, etc.

Pa oa an hanter-noz sonet
En iliz vraz ar Fouille (bis)
Me oa intanvez glac'haret
Va unan barz em gwele.

Foei, foei, foei, etc.

Draila ra eun hanter Pater,
Tana ra e gorn-butun, (bis)
Tapout a ra e grog pouezer
Evid mond var hent Sizun.

Foei, etc.

Gantan 'n em gav kamaraded
En eur vond da billaoua (bis)
E holl arc'hant en deuz fouetet
Ha tam pillou n'en devoa.

Foei, etc.

Mond a ra d'ar vilin baper
Gant eur sac'hadik pillou (bis)
Kalz buanoc'h eged eul laër
Rag preset eo an dellou.

Foei, etc.

Ha pa zistro d'ar gomanant
Raktal e sav eun tam kroz (bis)
— E pelec'h e ma da arc'hant ?
Me gred e maint en da gov.

Foei, etc.

Pa c'ha Iannik d'ar pardonioù
Bepred e ve mezo dall (bis)
Prest e oa da goll e vragou
E Lokeffret an de all.

Foei, etc.

Pa zeuio ar c'hiz er vro-ma
Da derri an dimeziou (bis)
Me a ielo en eur gana
Pell euz potred ar pillou.

Foei, etc.

Pa zeuio Karrik an Ankou
D'ober eun dro er vro-ma (bis)
Me ielo da laret d'ezan
Kas va fillaouer gantan.

Foei, etc.

Komzet vo d'an Aotrou Person
Deuz ar flerius pillauer (bis)
Vid ma kano al Libera
Hag ouspenn al Lib-e-rer.

Foei, foei, foei, va zammik aotrou,
Gant e stoup hag e billou !





Kanaouen an Durzunel

Ton anavezet.

Kalz amzer a meuz kollet
 O furchal ar c'hoajou
 Evid klask an durzunel
 Kousket var ar brankou,
 Devet a meuz va amors
 Ha tennet a meuz fall,
 Achapet an durzunel
 Ha nijet er c'hoat-all.

Diouz an noz hag ar mintin
 E klevan lapoused
 O kana, o fredonin
 Var vek ar gwe pignet.
 Mez n'euz nikun aneze
 Hag a bik ma c'halon
 Evel mouez eun durzunel
 O ouela d'he mignon.

Hirvoudi a ra noz-de
 Gant ar boan, ar glac'har,
 Evel eun intanvez paour
 Kollet ganthi he far.
 He mouez a zeu beteg d'in
 Hag a zo glac'harus
 Ha me da c'houlen ganthi
 He foaniou truezus :

— Petra, turzunel iaouank
 A dourmant da galon ?
 — Kollet a meuz, emezhi,
 Ma fidela mignon.

Ma na zeu eur chaseour
 Da ober d'in mervel
 Me varvo gant ar glac'har
 Da va mignon fidel.

N'euz na souten na remed
 Na konzolasion
 Barrek da zond da galmi
 Ankeniou ma c'halon.
 Trec'het on gant ar glac'har
 Mond a ran da vervel,
 Mez na varvin ket kontant
 Ma na varvan fidel.

Gwelet a meuz o vervel
 An durzunel iaouank,
 Dizec'het eo ma c'halon
 Gant ar boan, an tourmant.
 En he huanad diveza
 He deuz c'hoaz lavaret ;
 « O va gwir mignon fidel ! »
 Raktal eo tremenet.

Melezour skler ha brilliant
 Euz ar fidelite
 Te zo ar skuer ar gwirra
 Demeuz ar garante.
 Nan, na varvin ket kontant,
 Ma na varvan fidel !
 Birviken na zizonjin
 Maro an durzunel.